



Sanaziun Via Maistra Zernez - posiziun cumün sün protestas our da l'exposiziun publica gün 2021

In connex cul proget sanaziun Via Maistra Zernez sun sün basa dals resultats our da l'exposiziun publica da gün 2021 (protestas inoltradas) divers puncts averts ed in discussiun. Per pudair proseguir cun la procedura da permess e cumanzar a temp ütil cun la progettaziun da detagl ha la suprastanza cumünala trattà diversas pendenzas. Il proget gnarà in ün prossem pass surlavurà e publichà danövmaing.

EW Zernez - proget Ils Muots vest - decisiun da proget e da submittents

Pel proget da fabrica in Ils Muots a Brail esa stat da decider sur dals submittents per la furniziun da la cabina da scumpart e per la furniziun e trar aint il cabel da tensiun bassa i'ls s-chavs dal proget d'infrastructura inclus tuot ils attachs necessaris. Il gremi ha sancziunà la glista da submittents.

EW Zernez - proget Runatsch/Palü - decisiun da proget e da submittents

Il proget dal schlargiamaint dal provedimaint central chalur in Runatsch/Palü a Zernez es instradà. La suprastanza cumünala ha fat bun la glista da submittents per la furniziun e trar aint il cabel da tensiun bassa i'ls s-chavs dal proget inclus tuot ils attachs necessaris/previs.

Suprastanza cumünala in fracziuns

In mardi, ils 21 marz 2023 vain organisà il prüm inscunter da la suprastanza cumünala cun la populaziun cul nouv nom «suprastanza cumünala in fracziun». L'inscunter ha lö a partir da las 20:00h i'l Hotel Piz Linard a Lavin. La suprastanza cumünala infuorma a moda libra, sainza glista da tractandas e sainza protocol tanter oter sur da divers progets illa fracziun da Lavin ed in tuot il cumün e sta a disposiziun per dumondas e discussiuns da las votantas e votants dal Cumün da Zernez.